

玉函山房輯佚書

春秋規過二卷隋劉炫撰炫既作春秋左氏傳述義
又摘杜義中之失以正之自居乎杜氏之評友故書
名規過北史炫本傳及隋志並無此書之目唐志有
三卷攷北史述議隋志作述義並四十卷唐志述議
三十七卷規過三卷知北史隋志皆以規過附於四
十卷內唐始分著之也今佚孔氏正義序謂規杜氏
之失凡一百五十餘條而正義所引乃有一百七十
餘條或有一條內連及數事正義分載各經傳注下
者然其佚說固散見正義中矣輯爲二卷夫劉好非

春秋規過

序

毀索垢求癡固不免煩碎錯亂之處亦有顯爲杜失而孔疏必委曲護之左杜右劉前人固有定論已歷城馬國翰竹吾甫

如尼館利本
三十八卷三十一

春秋規過卷上

隋 劉炫 撰

隱公元年春王正月杜云凡人君卽位欲其體元以
居正

規云元正惟取始長之義不爲體元居正杜云欲
其體元以居正謂人君體是元長以居正位不欲
在下侵奪處位不終

孔穎達
正義

四年春王二月莒人伐杞取牟婁杜云書取言易也
規云上言伐下言取者非易

六年冬宋人取長葛杜云上有伐鄭圍長葛長葛鄭
邑可知

規云大都名通

七年我伐凡伯于楚丘以歸杜云但言以歸非執也
規云沈子邾子言以歸者皆執

八年傳以泰山之勗易許田杜云許田近許之田

規云別有許邑邑自名許非由近許國始名爲許
爲諡因以爲族杜云或使先人之諡稱以爲族

規云生賜族以諡爲族全無一人

正義引劉君以
諡二句又云必

如劉解生賜族文證
在何處上三字據補

十年秋宋人衛人入鄭宋人蔡人衛人伐戴鄭伯伐
取之杜云書取克之易

規云取之非易

十有一年傳及大逵杜云逵道方九軌也

規云逵爲九道交出也國國皆有逵道

並同上

桓公二年春王正月戊申朱督弑其君與夷及其大
夫孔父杜云稱名者內不能治其閨門外取怨於
民身死而禍及其君

規云先儒皆以善孔父而書字

正義引此句下言知不然者云云下

又言劉君不達此旨妄爲規過是劉用先儒意以規杜也據補

傳以郛大鼎賂公杜云郛國所造器也故繫名於郛
濟陰城武縣東南有北部城

規云杜注郛國濟陰城武縣東南有北部城郛宋
邑濟陰城武縣東南有郛城俱是城武縣東南相
去不遠何得所爲郛國所爲宋邑南郛北郛並宋

邑別有郛國

正義

大路越席杜云大路玉路

規云大路爲木路

深率鞞鞞杜云鞞佩刀削上餽鞞下飾

規云毛詩傳下曰鞞上曰琫

三年春正月杜云其或廢法違常失不班歷故不書
王

規云然天王失不班歷經不書王乃是國之大事
何得傳無異文又昭二十三年以後王室有子朝
之亂經皆書王豈是王室猶能班歷又襄二十七
年再失閏杜云魯之司歷頗置兩閏又哀十三年

十二月螽杜云季孫雖聞仲尼之言而不正歷如杜所注既天王所班魯人何得擅改又子朝奔楚其年王室方亂王位猶且未定諸侯不知所奉復有何人尙能班歷昭二十三年秋乃書天王居于狄泉則其春未有王矣時未有王歷無所出何故其年亦書王也若春秋之歷必是天王所班則周之錯失不關於魯魯人雖或知之無由輒得改正襄二十七年傳稱司歷過再失閏者是周司歷也魯司歷也而杜釋例云魯之司歷始覺其謬

兩閏以應天正若歷爲王班當一論王命寧敢專
置閏月改易歲年哀十三年十一月螽仲尼曰火
猶西流司歷過也杜於釋例又云季孫雖聞此言
猶不卽改明年復螽於是始悟十四年春乃置閏
欲以補正時歷旣言歷爲王班又稱魯人輒改之
不憚於王亦復何須王歷杜之此言自相矛盾以
此立說難得而通又案春秋經之闕文甚多其事
非一亦如夫人有氏無姜有姜無氏及大雨霖霽
咎如潰之類也此無王者正是闕文耳

六年傳嘉栗旨酒杜云栗謹敬也

規云栗爲穗貌並同上

十有一年九月宋人執鄭祭仲杜云祭氏仲名不稱行人聽迫脅以逐君罪之也

規云祭仲是字鄭人嘉之正義祭仲本非行人同上

十有五年許叔入于許杜云叔本不去國雖稱入非國逆例

規云杜失

十有六年冬城向杜云傳曰書時也而下有十一月

舊說因謂傳誤此城向亦俱是十一月但本事異
各隨本而書之耳經書夏叔弓如滕五月葬滕成
公傳云五月叔弓如滕卽知但稱時者未必與下
月異也又推按此年閏在六月則月卻而節前水
星可在十一月而正也詩云定之方中作于楚宮
此未正中也功役之事皆總指天象不與言歷數
同也故傳之釋經通言一時不月別

規云案周語云辰角見而雨畢天根見而水涸駘
見而隕霜火見而清風戒寒故先王之教曰雨畢

而除道水涸而成梁隕霜而冬裘具清風至而修
城郭故夏令曰九月除道十月成梁營室之中土
功其始先儒以爲建戌之月霜始降房星見霜降
之後寒至而心星見鄭元云辰角見謂九月本天
根見謂九月末天根謂氐星是也自然火見是建
亥之月又春秋城楚卽是正月而杜引詩云定之
方中未正中也定中豈正月未正中乎據此諸文
則火見土功必在建亥之月則建戌之月必無土
功之理而杜以爲建戌之月得城向者非也

並同
上

莊公十年秋荆敗蔡師于莘以蔡侯獻舞歸釋例云
據宗廟社稷已亡而君見獲於敵君身雖在與亡
無異皆以滅爲文則定六年鄭游速帥師滅許以
許男斯歸是也若社稷宗廟不亡君身見獲於敵
則云以歸此蔡侯獻舞歸是也

規云在陳死則稱滅以還者則言以歸

正義

十有七年春齊人執鄭詹杜云詹爲執政大臣詣齊
見執

規云此注云詣齊被執釋例曰詹本非出使二者

自相矛盾

二十二年傳陳侯使筮之遇觀之否杜云觀六四爻變而爲否

規云觀之否者爲觀卦之否爻屯之比者屯卦之比爻皆不取後卦之義

三十二年傳舉有力焉能投蓋于稷門杜云蓋覆也稷門魯南城門走而自投按其屋之桷反覆門上規云公言舉有力焉如杜此說勁捷耳非有力也當謂投車蓋過於稷門

並同上

閔公元年傳辛廖古之曰吉杜云辛廖晉大夫

規云若在晉國而筮何得云筮仕於晉又辛甲辛

有並是周人何故辛廖獨爲晉大夫正義服氏之說

以爲畢萬在周筮仕於晉又以晉姓不得辛姓同上

二年傳昔辛伯諗周桓公云內寵並后外寵二政嬖

子配適大都耦國亂之本也周公弗從故及於難

今亂本成矣杜云驪姬爲內寵二五爲外寵奚齊

爲嬖子曲沃爲大都故曰亂本成矣

規云二五嬖賤不得爲二政大子不以曲沃作亂

不得爲大都同上

僖公五年傳凡分至啓閉必書雲物杜云不言公者

日官掌其職

規云書雲物亦是公親爲之但上文有公既視朔

故下文去公字耳

正義

九年春王三月丁丑宋公御說卒杜云四同盟

規云數莊公之盟不數召陵六同盟

正義云御說以莊十三年

即位十六年盟于陶十九年于鄆二十七年于陶
僖元年于榘四年于召陵五年于首止七年于蒲
母八年于洮皆魯宋俱在是爲八同盟不數莊公
之盟榘盟經不書亦不數故云四同盟別君乃數

韋之盟又不數名陸以爲六同盟而規杜

十年傳遂殺平鄭祁舉及七與大夫杜云侯伯七命副車七乘

規云服虔云上軍之與帥七人屬申生者襄二十三年下軍與帥七人往前申生將上軍今七與大夫爲申生報怨欒盈將下軍故七與大夫與欒氏炫謂服言是正義

十有五年傳卜徒父筮之杜云卜人而用筮不能通三易之占故據其所見雜占而言之

規云案成十六年筮卦遇復云南國蹇射其元王
中厥目亦是雜占則筮法亦用雜占不必皆取易
辭

涉河侯車敗杜云秦伯之軍涉河則晉侯車敗也

規云侯者五等總名國君大號涉河侯車敗秦伯
車敗韓戰之前秦晉未有交兵何得言晉侯車有
三敗以爲秦伯車三敗也

三敗及韓杜云晉侯車三敗

此一句是史家序事充卜人之語言秦伯之車三

經敗壞乃至於韓而晉始懼

此一役也杜云言遣惠公使諸侯威服復可當一事之功

規云服虔云一役者韓戰之役

十有六年三月壬申公子季友來季杜云稱字者貴之規云季爲氏季友仲遂皆生賜族非字也

十有七年夏滅項杜云公在會別遣師滅項不言師諱之

規云案傳齊人以爲討討其滅國非討用師旣不

諱滅何以諱師炫謂將卑師少稱人不可自言魯人故不稱師

十有九年己酉邾人執郕子而用之杜云不書社赴不及也

規云執蔡世子友用之不言岡山此何須云于社傳夏宋公使邾文公用郕子于次睢之社欲以屬東夷杜云東夷皆社祀之蓋殺人而用祭

規云按昭十年季平子伐莒獻俘始用人於亳社彼亳社舊不用人杜何以知此社殺人而用祭乎

二十有三年夏五月庚寅宋公茲父卒杜云三同盟
規云宋公不與薄盟

傳公子賦河水公賦六月杜云河水逸詩義取河水
朝宗于海海喻秦六月詩小雅道尹吉甫佐宣王
征伐喻公子還晉必能匡王國古者禮會因古詩
以見意欲言賦詩斷章也其全稱詩篇者多取首
章之義

規云案春秋賦詩有雖舉篇名不取首章之義者
故襄二十七年公孫段賦桑扈趙孟曰匪交匪敖

是乃卒章又昭元年云令尹賦大明之首章既特言首章明知舉篇名者不是首章

二十有五年傳昔趙衰以壺飧從徑餒而弗食杜云徑猶行也

規云徑爲經謂經歷饑餒下屬爲句

二十有六年傳室如縣罄杜云如而也時夏四月今之二月野物未成故言居室而資糧縣盡

規云如罄在縣下無粟帛

葵子不祀祝融與鬻熊杜云鬻熊祝融之十二世孫

規云計其間出有一千二百年畧而言之則百年爲一世計父子爲十二世何以得近千二百年乎二十有七年傳先軫日報施救患取威定霸於是乎在矣杜云先軫晉下軍之佐原軫也

規云下蒐于被廬先軫始佐下軍此時未爲下軍之佐

二十有八年夏四月己巳晉侯齊師宋師秦師及楚人戰于城濮楚師敗績杜云子玉及陳蔡之師不書楚人恥敗告文畧也

規云晉人告畧

傳晉中軍風于澤亡大旆之左旂杜云牛馬囚風而走皆失之

規云放牛馬於澤遺失大旆左旂不失牛馬

二十有九年傳卿不書罪之也在禮卿不書公侯會伯子男可也杜云晉侯始霸翼戴天子諸侯輯睦王室無虞而王子虎下盟列國以瀆大典諸侯大夫上敵公侯虧禮傷教故貶諸大夫諱公與盟大國之卿當小國之君故可以會伯子男諸卿之見

貶亦兼有此闕故傳重發之

規云直言其敵公侯不責其盟王使並同

三十有二年夏四月己丑鄭伯捷卒杜云三同盟

規云捷以莊二十二年卽位至此與魯十餘同盟

言三同盟者謬正義止言規其謬捷以至盟者據正義補

三十有三年晉人敗狄于箕杜云卻缺稱人者未爲

卿

規云案傳晉侯親兵先軫死敵則將帥非卻缺也

而稱人者晉諱而以微人告正義晉侯稱人同於殺

諱同上又春秋序正義

文公二年丁丑作僖公主杜云主者殷人以柏周人

以栗

規云公羊傳曰主者曷用虞主用桑練主用栗正義

云劉炫就所以規杜過上引公羊傳云云據補

二年傳吾見新鬼大故鬼小杜云新鬼僖公既為兄

時年又長故鬼閔公死時年少

規云直據兄弟大小為義不須云死之長幼正義

五年傳晉陽處父聘于衛過甯瀛從之杜云瀛逆

旅大夫

規云甯嬴直是逆旅之主非大夫也

六年傳秋季文子將聘於晉使求遭喪之禮以行杜云問晉侯疾故

規云聘使之法自須造遭喪之禮而行防其未然也非是問晉侯有疾

七年傳宣子說之杜云爲明年晉歸鄭衛田張本

規云歸鄭及歸衛田經傳文歸衛不歸鄭

八年傳且復致公堵池之封自申至于虎牢之竟杜

云公壻池晉君女壻又取衛地以封之

規云服虔以爲致之于鄭服言是

十有一年傳陳侯鄭伯會楚子于息冬遂及蔡侯次
于厥貉杜云陳鄭及宋麋子不書者宋鄭執卑苟
免爲楚僕任受役於司馬麋子恥之遂逃而歸三
君失位降爵故不列於諸侯宋鄭猶然則陳侯必
同也

規云告文畧故不書陳鄭宋

並同上

十有三年邾子蕩蒯卒杜云未同盟而赴以盟

規云僖元年與魯盟于犂

正義云劉炫以犂盟規之上有此句據補

十有五年傳惠叔猶毀以爲請杜云敖卒則惠叔請之至今期年而猶未已毀過喪禮

規云敖去年九月卒至今夏據月未匝不得稱期年

十有六年傳先君蚡目所以服慙隰也杜云蚡冒楚武王父

規云按楚世家蚡冒卒弟熊達殺蚡冒子而代立是爲楚武王則蚡冒是兄不得爲父

十有七年傳鹿死不擇音杜云音所秣蔭之處古字聲同皆相假借

規云服虔云鹿得美草呦呦相呼至於困迫將死不暇復擇善音急之至也音聲謂不擇音聲而出之並同上

宣公元年傳皆取賂而還杜云文十五年十七年二虓之盟皆受賂

規云案傳數晉罪近發宋弑昭公前虓之盟文所不及何當虛指其事言皆取賂炫謂宋及晉平取

宋賂爲魯討齊取齊賂也

正義傳文先後顛倒

又曾于扈爲十七年之事

同上

三年冬十月丙戌鄭伯蘭卒杜云再與文同盟

規云文二年盟于垂隴七年于扈十四年于新城

魯鄭俱在當言三同盟

正義云劉炫規之上有此四句據補

六年傳以盈其貫杜云貫猶習也

規云按尙書泰誓武王數紂之惡云商罪貫盈言

紂之爲惡如物在繩索之貫不得爲習也

正義

八年傳楚爲衆舒叛故伐舒蓼滅之杜云舒蓼二國

春秋規過

卷上

三十八卷四十六

名

規云杜爲二國當云一國名

正義云劉炫以杜爲一國而規之上有當

云一國名句據補

九年辛酉晉侯黑臀卒于扈杜云卒于竟外故書地

四與文同盟

規云黑臀以二年始立而云四與同盟者過

正義云劉

炫以此規杜據補

襄七年鄭伯髡頑卒於鄴昭二十五年

宋公佐卒於曲棘竟內亦書地非竟外

正義

冬十月癸酉衛侯鄭卒杜云三與文同盟

規云文七年于扈十四年于新城唯二與文同盟

正義云劉炫以
此規杜據補

十有二年傳先穀佐之杜云箕季代林父

規云傳文皆稱箕子何以知是箕季穀非箕季

老有加惠杜云賜老則不計勞

規云老者當有恩惠之賜非勞役之限

其三曰鋪時釋思我徂維求定其六曰綏萬邦屢豐
年杜云其三三篇其六六篇

規云其三其六者是楚子第三引鋪時釋思第六

引綏萬邦

故使子孫無忘其章杜云著之篇章使子孫不忘

規云能有七德故子孫不忘章明功業

十有四年傳衛人以爲成勞復室其子杜云以有平國之功復以女妻之

規云傳文無衛侯之女爲孔達之妻復室其子謂復以室家還其子

於是有庭實旅百杜云主人亦設簋豆百品實於庭以答賓

規云炫以杜注莊二十二年庭實旅百奉之以玉帛諸侯朝王陳幣帛之衆則朝聘陳幣亦實百品於庭非獨主人也

朝而獻功於是有容貌采章嘉淑而有加貨杜云幣帛也言往共則來報亦備

規云按此勸君行聘唯當論聘之義深不宜言主之禮備豈慮楚不禮而言此也君之威儀無時可舍豈待朝聘賓至乃始審威儀正顏色無賓客則驕容儀容儀非報賓之物何言報禮備又獻其治

國傳稱朝以正班爵之儀率長幼之序則不名獻
功成二年王禮鞶伯如侯伯克敵使大夫告慶之
禮則侯伯克敵祇合使大夫告王征伐之功何故
親朝獻收伯禮小朝大小國不合專征伐復有何
功可獻玆謂采章加貨則聘享獻國所有玄纁璣
組羽毛齒革皆充衣服旌旗之飾可以爲容貌物
采文章嘉淑謂美善之物加貨言賄賂之多皆資
所獻亦庭實也於聘總言庭實於朝指其所有詳
於君略於臣也案莊二十二年傳庭實旅百則朝

者庭實又成二年傳侯伯克敵使大夫告慶之禮
據此文則聘賓有庭實又庭實旅百與容貌采章
相對杜何知庭實容貌之等非是賓之所有必爲
主人之物又君無獻征伐之功何以知獻功於仁
牧

十有五年傳山藪藏疾杜云山之有林藪毒害者居
之

規云澤旁之藪

並同上

成公二年傳齊侯免求丑父三入三出杜云重其代

亡故三入晉軍求之

規云齊侯三入齊軍又三出齊軍以求丑父每出之時齊之將帥敗而怖懼以師而退不待齊侯致

使齊侯入于狄卒

正義

傲邑之幸亦云從也況其不幸敢不唯命是聽杜云言完全之時尚不敢違晉今若不幸則從命

規云齊人請戰言傲邑脫或有幸戰勝亦云從也賜三帥先路三命之服杜云已嘗受王先路之服今改而易新并此車所建所服之物

規之旣言先路則是晉君之賜杜云受王先路之賜非其義也

八月宋文公卒始厚葬用蜃炭杜云燒蛤爲炭以瘞壙

規云用蜃復用炭

何臣之爲杜云若言何用爲臣

規云不成臣

三年傳晉卻克衛孫良夫伐虜咎如討赤狄之餘焉杜云宣十五年晉滅赤狄潞氏其餘民散入虜咎

如故討之

規云膚咎如卽是赤狄之餘

六年二月辛巳立武宮杜云魯人自鞏之功至今無
患故築武軍又作先君武公宮以告成事欲以示
後世

規云唯築武公之宮

十年不居育之上膏之下甘云育爾也心下爲膏

規云釋前者爲膏連心之拍不得稱膏膏當爲爾
十有三年傳諸侯疾之將致命于奏杜示致死命而

討秦時無諸侯盭諸侯通致此意

規云誣秦實無諸侯

我寡君是以有令狐之會杜云申厲公之命宜言寡人稱君誤也

規云臣之出使自稱已君皆曰寡君今呂相強奉君兼有已語稱寡君正是其理杜何知宜爲寡人稱君爲誤

十有六年傳欒范以其族夾公行杜云二族強故在公左右

規云族者屬也屬謂中軍以中軍夾公耳非謂宗族之兵

敢告不寧君命之辱杜云以君辱賜命故不敢自安
規云楚王云無乃傷乎恐其傷也答云敢告不寧
告其身不傷耳魏犢云不有寧也以傷爲寧此與

魏犢相似

並同上

十有七年邾子貜且卒杜云五同盟

規云貜且以文十四年卽位宣十七年盟于斷道
成二年于蜀五年于蟲牢七年于馬陵九年于蒲

十五年于戚此年于柯陵凡七同盟而云五者過
正義云此二年盟獨十七年盟柯陵皆邪之大夫
故不數之劉焯并數二盟而埤其巡據正義補
六月戊辰士燮卒杜云傳言庸公無道故賢良憂懼
因禱自裁

規云士燮及昭子之卒適與死會非自殺正義

春秋規過卷下

襄公四年傳金奏肆夏之三杜云周禮以鍾鼓奏九夏其二曰肆夏一名樊三曰韶夏一名遏四曰納夏一名渠

規云杜以此解腹允三夏之名而分字配篇不甚愜當何則文王之三卽文王是其一太明諒是其二鹿鳴之三則鹿鳴是其一朝獻皇皇者華是其二然則肆夏之三亦當肆夏是其一樊遏渠是其二安得復以樊爲肆夏之別名也若樊卽是肆夏

何須重舉二名雖恥習先蹤亦未踰先哲

正義

九年傳使西鉏吾庀府守杜云府六官之典

規云府守謂府庫守藏

十有一年公會晉侯宋公衛侯曹伯齊世子光莒子
邾子滕子薛伯杞伯小邾子伐鄭杜云世子光至
復在莒子之先故晉悼亦進之

規云序莒上者直至先至非爲先莒

公至自會杜云以會至者觀兵而不果侵伐

規云杜釋例自言事勢相接或以始致或以終致

是時史異辭何爲此注而云不果侵伐

十有二年秋九月吳子乘卒杜云五年魯子戚公不與盟而赴以名

規云杜於五年注以爲公及其盟還而不以盟告廟也今注云會於戚公不與盟而赴以名何爲兩注自相矛盾

十有四年傳故夏書曰道人以木鐸徇于路杜云逸書道人行令之官也

規云杜不見古文道人爲宣令之官徇路求諫

通同

上

十有七年邾子貜卒林云四同盟

規云杜氏誤

正義

邾以成十八年卽位其年盟于虛

邾襄三年于雞澤五年于戚九年于戲十一年于

亳城北十六年于濮梁皆魯邾俱在凡六同盟

正義

補

十有八年曹伯負芻卒于師杜云三同盟

規云杜誤

正義

負芻以成十四年卽位十五年盟于

戚十七年于柯陵襄五年于戚九年于戲十一年

于亳城北十六年于溴梁凡六同盟據正義補

傳齊侯禦諸平陰塹防門而守之廣里杜云防有門

於門外作塹橫行廣一里故經書圍

規云案下傳范鞅門于雍門又門于揚門州綽門

于東閭既門其三門卽是圍事杜何知不以門于

三門爲圍必以禦諸平陰爲圍乎正義

十有九年秋七月辛卯齊侯環卒杜云世子光三與

魯同盟

規云杜誤正義環以成十年卽位十五年國佐盟于

春秋規過 卷下 三 鄭媛館補校

成十七年同盟于柯陵十八年崔杼于虛杙襄三
年世子光于雞澤五年世子光于戚九年世子光
于戲十一年世子光于亳城北不數成公之世世
子光猶四同盟

據正義補

二十有一年傳邾庶其以濼閭丘來奔季武子以公
姑姊妻之杜云計公年不得有未嫁姑姊證寡者
二人

規云案十二年傳云無女而有姊妹及姑姊妹則
古人謂姑爲姑姊妹也而知此姑姊是襄公父之

姊止一人耳不得云寡者二人

正義又正義序引作是襄公之姊

成公之姊只

一人而已

書曰聖有謨勳明徵定保杜云逸書謨謀也勳功也

規云此引書曰夏書胤征之文也彼作聖有謨訓

此云惠訓不倦則本當作訓

正義云劉背傳文而規杜氏上有此文卽

述劉語也據補

二十有三年

夏桀畀我來奔杜云畀我是庶其之黨同有竊邑叛

君之罪來奔故書

春秋規過

卷下

四知嫂館補校

規云杜此注云庶其之黨庶其奔魯三年若是其黨邾人卽應討之何因至今始奔庶其以邑奔魯魯人還以賜之界我不得彼邑竊邑之狀復何在焉釋例又曰小國之卿或命而禮儀不備或未加命數故不書之邾界我之等其奔亡亦多所書唯數人而已知其合制者少也如彼所說又以界我是卿何爲兩說自相矛盾乎

正義

知悼子少杜云少年十七

規云計悼子年十六不得爲十七

正義云劉炫以此而規杜氏

二十有四年傳在周爲唐杜氏杜云唐杜二國名殷末豕韋國於唐周成王滅遷之於杜伯

規云案杜於昭元年注云唐人若劉累之等累遷魯縣此在大夏卽如彼言則居唐之人非累之裔

此注何云豕韋國於唐也又據何文知初封於唐

後封於杜乎正義唐非豕韋之胤杜亦未必是後安

知滅唐遷於杜也賈逵注國語云武王封堯後爲

唐杜二國以爲竝時爲國非滅唐封杜上同宣子歷

言己之宗族於上世有國有家未必繼體相承上同

二十有五年傳及處守者皆有賂杜云皆以男女爲賂

規云男女以班示降服於晉有賂者皆有貨財賂之非以男女爲賂

晉侯許之杜云晉侯受賂還不譏者齊有喪師自宜遷

規云齊弑君之後晉始來伐

秋七月己巳同盟于重丘齊成故也杜云伐齊而稱同盟以明齊亦同盟

規云齊直遣慶封如師齊侯不與盟

二十有六年傳先八邑杜云先八邑三十二井

規云案論語有十室之邑又杜注免餘邑爲一乘之邑又宋鄭之間之邑出戈錫等杜何以知此邑非彼等之邑必以爲四井之邑

取衛西鄙懿氏六十以與孫氏杜云取田六十井也規云服虔云六十邑服言爲是

二十有七年傳伯有賦鵲之賁賁杜云義取人之無良我以爲兄我以爲君也

春秋規過

卷下

六 婦嬖館校

三十八

規云非兄

二十有八年傳而飲酒且觀優至於魚里杜云優在魚里就觀之

規云國人從傍爲優引行以至魚里

並同上

二十有九年庚午衛侯衎卒杜云四同盟

規云衎以成十五年卽位其年盟于戚十七年于柯陵十八年于虛打襄三年于雞澤五年于戚七年及孫林父盟九年于戲十一年于毫城北二十七年于朱圻自前卽位及後復歸凡與魯九同盟

據正
義而杜云四同盟者誤義

傳爲之歌小雅曰美哉思而不貳怨而不言其周德
之衰乎猶有先王之遺民焉杜云思文王之德無
貳叛之心有哀音衰小也謂有殷王餘俗故未大
衰

規云服虔以爲此歎變小雅也其意言思上世之
明聖而不貳於當時之王怨當時之政而不有背
叛之志也其周德之衰微乎疑其幽厲之政也服
虔爲然杜解錯謬

盛德之所同也杜云頌有殷魯故曰盛德之所同

規云魯頌只美僖公之德本非德洽之歌何知不

直據周頌而云頌有商魯乎

並同上

三十年傳降婁中而且杜云周七月今五月降婁中而天明

規云五月降婁未中

正義

月令且危中

正義云劉以月令之文而

規杜氏上引此句據補

昭公元年三月取鄆杜云不稱將帥將卑師少書取

言易也

規云賈逵云楚以伐莒來討故諱伐不諱取賈說
爲是案傳武子伐莒知非將卑師少也稱伐則是
非易也杜何得以爲易將卑師少乎

正義

傳齊國子曰吾代二子愍矣杜云二子謂王子圍及
伯州犂圍此冬使犂位不能自終州犂亦尋爲圍
所殺故言可愍

規云服虔云愍憂也代伯州犂憂公子圍代子羽
愍子皙杜失

十一月元酉杜云長歷推己酉十二月六日經傳皆

言十一月日誤也

規云杜言十一月誤當爲十二月

十二月晉既烝趙孟適南陽將會孟子餘甲辰朔烝于溫杜云趙氏烝祭甲辰十二月朔晉既烝趙孟乃烝其家廟則晉烝當在甲辰之前傳言十二月誤

規云晉烝及趙孟適南陽並在十一月之前文繫十二月者欲見烝後卽行先公後私十二月之文爲下甲辰朔起本舉月遙屬下明晉烝猶在朔前

十二月非誤也

三月春王正月丁未滕子原卒杜云襄二十五年盟重丘

規云襄五年盟于戚九年于歲十一年于亳城北十九年于祝柯二十年于澶淵二十五年于重丘

皆魯滕俱在凡六同盟據正義補皆滕成公正義

四年傳西陸朝覲而出之杜云謂夏三月日在昴畢蟄蟲出而用冰春分之中奎星朝見東方

規云春分奎星已見杜以夏三月仍云奎始朝見

非其義也杜鄭及服三說鄭爲近之

五年傳叔禽叔椒子羽杜云皆韓起庶子

規云叔禽等亦是韓起之族

羊舌四族杜云銅鞮伯華叔向叔魚叔虎兄弟四人

規云叔虎於時已死別有季夙

因其十家九縣杜云韓氏七羊舌氏四而官十家者
舉大數也

規云韓須是起之門子不別更稱家去韓須之外
韓氏唯有六家羊舌四族故爲十家也

七年傳明年王寅余又將殺段也杜云公孫段豐氏黨

規云段卽豐氏當言駟氏黨字之誤

八年夏四月辛丑陳侯溺卒杜云襄二十七年大夫盟于宋

規云往年衛侯惡卒杜云元年大夫盟于虢此不數號上下自相反

九年二月庚申楚公子棄疾遷許于夷實城父杜云此時改城父爲夷故傳實之

規云僖公襄公之世已有析名

逐楚而建陳也杜云水得妃而與陳與則楚衰

規云逐爲遁言火逃遁去而建立陳國

並同上

十年十有二月甲子宋公成卒杜云十一同盟也

規云成以成十六年卽位十七年盟于柯陵十八

年于虛打襄三年于雞澤五年于戚九年于戲十

一年于毫城北十五年及向戌盟于劉十六年于

溴梁十九年于祝柯二十年于澶淵二十五年于

重丘二十七年于宋元年于號皆魯宋俱在凡十

三同盟

正義引此云劉炫并數以規杜過據補

十有一年傳朝有著定杜云著定朝內列位常處謂之表著

規云下文有著有表二文不同以著定爲朝有著不得謂之表著

鄭莊公城櫟而寅子元焉使昭公不立杜云子元鄭公子莊公寅子元於櫟桓十五年厲公因之以殺櫟大夫檀伯遂居櫟使昭公不安位而見殺

規云傳言城櫟以置子元當謂賜元以櫟則以元

爲櫟邑之長若其別有大夫子元寄居於櫟便是
城櫟以置檀伯何言置子元也若厲公因子元以
殺檀伯則子元是櫟邑之一夫耳豈是莊公城櫟
之咎乎且桓十五年傳云鄭因櫟人殺檀伯不言
因子元也子元鄭之公子不得爲櫟人也鄭衆云
子元卽檀伯也厲公殺檀伯居櫟因櫟之衆偏弱
昭公使至殺死按桓五年傳云子元請爲左拒卽
云曼伯爲右拒則曼伯子元近是爲一

十有二年春高偃帥師納北燕伯于陽杜云高偃高

侯立孫

規云杜預以偃與鄆爲一亦云高侯立孫按襄二十九年傳云敬仲曾孫鄆非立孫也

公子慙遂如晉杜云慙魯大夫如晉不書還不復命而奔故史不書於策

規云杜以慙還不復命於介而奔止可不書其還何故如晉亦不書也此蓋爲君使臣聘必當告廟告廟乃得書於策公歸告復不告使慙故不書如晉

春秋規過

卷下

主 鄭娘館補校

有酒如淮有肉如坻杜云淮水名坻山名

規云淮坻非韻淮當作淮坻爲水中之地山無名坻者

晉荀吳僞會齊師者假道於鮮虞遂入昔陽杜云鮮虞白狄別種在中山新市縣昔陽肥國都樂平沽縣東有昔陽城

規云齊在晉東僞會齊師當自晉而東行也假道鮮虞遂入昔陽則昔陽當在鮮虞之東也今按樂平沽縣在中山新市西南五百餘里何當假道於

東北之鮮虞而反人西南之昔陽也既入昔陽而
別言滅肥則肥與昔陽不得爲一安得以昔陽爲
肥之都也肥爲小國竟不必遠豈肥名取鉅鹿之
城建都於樂平之縣也十五年荀吳伐鮮虞圍鼓
杜云鼓白狄之別鉅鹿下曲陽縣有鼓聚炫謂肥
鼓並在鉅鹿昔陽卽是鼓都在鮮虞之東南也二
十二年傳晉荀吳使師僞殺者負甲以息於昔陽
之門外遂襲鼓滅之則昔陽之爲鼓都斷可知矣
僕析父從杜云楚大夫右尹子犛夕杜云鄭丹

僕析父從右尹子革夕見於王爲下與革語張本
是四國者專足畏也杜云四國陳蔡二不羹

規云楚語云靈王城陳蔡不羹使僕夫子皙問於
范無宇曰今吾城三國賦皆千乘亦當晉矣諸侯
其來乎對曰是三城者豈不使諸侯之惕焉彼再
言三城無四國也縱使不羹有二或當前後遷焉
非是並有二也炫謂古四字積畫四當爲三

十有三年傳夏五月癸亥王縊于莘尹申亥氏杜云
癸亥五月二十六日皆在乙卯丙辰後傳終言之

經書四月誤

規云杜此注經書四月誤案上經注云靈王實以五月死楚人失靈王本其始禍以赴兩注不同杜非

不明棄共百事不終所由傾覆也杜云信義不明棄威不威棄禮無禮無經無業故百事不成

規云此傳四文皆緣上事而致下事其上則事業禮威所致則經序共明傳旣言不明棄共當云不共棄序不序棄經不經棄事今杜云不明則棄威

春秋規過

卷下

三十八卷六十六

不威棄禮無禮無經無業違背傳文

十有四年傳曰義也夫可謂直矣杜云於義未安直則有之

規云直則是義

十有六年傳受脤歸脤杜云受脤謂君祭以肉賜大夫歸脤謂大夫祭歸肉於公皆社之戎祭也

規云脤亦祭廟之肉

十有八年傳許不專於楚杜云自以魯國不專心事楚

規云當時許之於楚更無異望非敢恃舊國不事之楚當以畏鄭之故外設預備不得專心事楚耳十有九年傳及師至則投諸外杜云投繩城外隨之而出

規云唯投繩城外婦人不出

二十年傳丁巳晦公入與北宮喜盟于彭水之上

規云日誤

七音杜云周武王伐紂自午及子凡七日王因此數合之以聲昭之故以七同其數以律呂和其聲謂

之七音

規云杜旣取國語之文以七同其數以律和其聲何爲又云自午及子凡七日乎是杜意以武王爲七日之故而作樂用七音也違國語之文是杜說謬

二十有一年傳使有司以齊鮑國歸費之禮爲士鞅杜云牢禮各如其命數魯人失禮故爲鮑國七牢規云案聘禮使卿主國待之饗餼五牢則臣之牢禮不依命數鮑國禮當五牢加二牢耳

二十有三年戊辰吳敗頓胡沈蔡之師于雞父杜云
不書楚楚不戰也

規云服虔義云不書楚楚諱敗不告

傳王子朝入于尹杜云自京入尹氏之邑

規云前年王師已克子朝從京入郊郊潰不知子
朝所在

書曰胡子髡沈子逞滅獲陳夏齏君臣之辭也杜云
國君社稷之主與宗廟共其存亡故稱滅大夫輕
故曰獲釋例曰國君者社稷之主百姓之望當與

社稷宗廟其其存亡者也而見獲於敵國雖存若
亡死之與生皆與滅同

規云此沈胡之君戰死故言滅也春秋君戰生見
獲者皆言以歸不書滅何得言雖存若亡皆爲滅
公羊傳曰其言滅獲何別君臣也君死於位曰滅
生得曰獲大夫生死皆曰獲以爲君死曰滅生曰
以歸韓戰貶晉侯從大夫例故書獲

二十有四年傳對曰何害同德度義杜云言唯同心
同德則能謀義子朝不能於我無害

規云案孔安國云德鈞則秉義者彊衰弘此言取
彼爲說必其與彼德同乃度義之勝負但使德勝
不畏彼彊故卽引秦誓而勸其務德杜爲不見古
文故致有此謬

大誓曰紂有億兆夷人亦有離德杜云言衆億兆兼
有四夷不能同德終必亡

規云孔安國云夷人謂平人杜義短

正義引孔說
云劉炫以爲

過而規
其短

二十有五年傳宋公享昭子賦新宮昭子賦車轄杜

云詩小雅周人思得賢女以配君子昭子將爲季孫迎宋公女故賦之

規云昭子賦車轄不爲逆女新宮非婚姻之事

則天之明因地之性杜云日月星辰天之明也高下剛柔地之性也

規云刑罰威獄溫慈惠和

八字據正義補

杜不具載其文

十二月庚辰齊侯圍郕杜云欲取以居公不書圍郕人自服不成圍

規云此時圍郕而未得明年方始取之經卽因圍

書取傳言賀聞之日非自服也

二十有六年冬十月天王入于成周杜云傳言王入
在子朝奔後經在前者子朝來告晚

規云杜以朝既奔楚王始得入入必在朝奔後經
書王入在前傳有告于諸侯之語故以爲王告入
在前朝奔在後故先書王入炆謂子朝出亦王告
下注與此自違

尹氏名伯毛伯以王子朝奔楚杜云書奔在王入下
者王入乃告諸侯

規云杜上注云子朝來告晚何爲此注又云王入
乃告諸侯以二注不同將爲杜失

傳至于厲王王心戾虐萬民弗忍居王于彘杜云不
忍害王也厲王之末周人流王于彘

規云按周本紀民相與叛襲厲王厲王出奔于彘
周語又曰彘之亂宣王在名公之宮國人圍之名
公知之乃以其子代宣王言代王則國人謂是宣
王國語雖不言殺必殺之矣國人相與襲王王旣
奔免得王子而殺之若得厲王亦應不舍而杜云

不忍害王未必然也嘗謂不忍者不能忍王之虐也

矯誣先王杜云先王謂景王

規云先世之王

二十有七年傳乃飲酒使宰獻而請安杜云禮君不
敵臣宴大夫使宰爲主獻獻爵也請安齊侯請自
安不在坐也

規云按燕禮司正洗角解南面坐奠於中庭升東
楹之東受命西階上北面命卿大夫君曰以我安

卿大夫皆對曰諾敢不安彼是請賓使自安當如
彼使宰請魯侯自安耳王人請安謂主人使司正
請安于賓服虔亦然杜今云齊侯請自安非也並同
上

二十有九年傳木正曰句芒杜云取木生句曲而有
芒角也

規云貫達云總言萬物句芒非專木生如句也正義

引劉炫不言規杜案
其詞義亦規過文

有烈山之子曰柱爲稷杜云烈山氏神農世諸侯

規云烈山氏卽神農非諸侯

三十有二年傳崇文德焉杜云所以崇文王之德

規云崇文德之教

並同上

定公四年春王二月癸巳陳侯吳卒杜云正月七日

書二月從赴

規云諸侯五月而葬下云六月葬陳惠公則陳侯卒在二月以爲日誤

五月公及諸侯盟于皐鼫杜云復稱公者會盟異處故

規云會盟異處故復稱公按襄二十五年盟重丘亦是會盟異處何以不言公

傳社稷不動祝不出竟杜云社稷動謂國遷

規云社稷動謂軍行

七年九月大雩杜云過也

規云賈逵云旱也

八年傳公會晉師于瓦杜云卿不書禮不敵公史畧之

規云案宣元年會晉師于裴林伐鄭杜云趙盾稱

師會故稱師何知此非亦以師會故稱師而云禮不敵公畧稱師乎

九年秋齊侯衛侯次于五氏杜云不書伐者諱伐盟主以次告

規云不告伐故不書

傳凡獲器用曰得得用焉曰獲杜云謂用器物以有獲若麟爲田獲俘爲戰獲

規云得器用焉曰獲謂得此可用爲器之物謂之爲獲若麟之皮角之屬杜解爲非

齊師克城而驕其帥又賤杜云城謂夷儀也帥謂東郭書

規云案上伐夷儀乃齊侯親兵所陳東郭書之事非是將卽杜何知帥爲東郭書若東郭書爲帥則人無不識何故云暫幘而衣粗製齊侯使視之乃知夫子也且書若爲帥被晉之敗何故君以爲功而更受賞乎

十有三年傳春齊侯衛侯次于垂葭實耶氏杜云垂葭改名耶氏

規云杜注自違釋例以爲地無新舊之異止是一

地二名

並同上

哀公元年傳夫屯晝夜九日杜云夫猶兵也壘未成故令人在壘裏屯守蔡

規云杜言夫猶兵也以壘未成故令人在壘裏屯守蔡然則未築壘前兵豈遠城乎壘成之後兵復出壘乎以圍人夜守常事何言晝夜九日以後兵豈散乎炫以夫屯謂夫役屯聚晝夜不止九日而築壘成耳夫者別有城夫非戰士

正義

齊侯衛侯會于乾侯救范氏也師及齊師衛孔圉鮮
虞人伐晉取棘蒲杜云魯師不書非公命也孔圉
孔烝鉏曾孫鮮虞狄師賤故不書

規云齊衛會乾侯救范氏者師相會因而行伐二
君親行告伐不告會也行伐之後魯與鮮虞會之
齊衛更遣師與同伐也但齊將卑師衆故稱師衛
將尊師少故云孔圉後伐四國並皆不書非獨魯
與鮮虞不書也當謂魯師不書非公命餘者不書
皆不告義出百塗並得通也

二年癸巳叔孫州仇仲孫何忌及下人盟于句繹杜
云句繹邾地

規云句繹爲小邾地

六年傳卜戰不吉卜退不吉王曰然則死也再敗楚
師不如死杜云前已敗於柏人今若退還亦是敗
規云卜不吉謂戰當敗再敗當謂今伐更敗也杜
言退還亦是敗非也

八年傳及吳師至拘者道之以伐武城克之杜云鄆
人教吳必可克

規云實克武城

景伯負載造於萊門杜云以言不見從故負載書將欲出

規云載書盟主所制自當吳人爲之何由復出魯國又載書數簡之文耳何須負之且諸言載書未有單稱載者以爲負載器物欲往質於吳

十有二年傳孔子與弔適季氏不絕放經而拜杜云孔子始老故爲弔也

規云按十六年仲尼卒哀公諫之子贛譏云生不

能用則是哀公不用仲尼爲臣也又世家及諸書無云仲尼仕於哀公杜焉得云孔子始老可

九月宋向巢伐鄭取錫殺元公之孫遂圍鄭十二月鄭罕達救岳丙申圍宋師杜云此事經在十二月孟上今倒在下更具列其月以爲別者三明本不以爲義例故不皆齊同

規云傳說當時事耳更倒本隙地之事載其日月使與明年相接

十有三年傳大事未成二臣之事也杜云二臣歎與

春秋規過

卷下

三朝紀事補正
二十八卷上十八

寅

規云吳晉二臣

十有四年傳逢澤介麋焉杜云介大也

規云介麋一麋

十有六年夏四月己丑孔丘卒杜云仲尼既告老去
位猶書卒者魯之君臣宗其聖德殊而異之

規云春秋之例卿乃書卒縱令仲尼不告老例不
合書而杜云告老去位猶書卒非也

十七年傳衛流而方羊裔焉杜云裔水边言衛侯將

若此魚

規云卜繇之辭文句相韻齋焉二字宜向下讀之
齋焉大國謂土地遠焉之大國

武伯問於高柴曰諸侯盟誰執牛耳季羔曰鄫衍之
役吳公子姑曹發陽之役衛石魋武伯曰然則彘
也杜云鄫衍則大國執發陽則小國執據時執者
無常故武伯自以爲可執

規云小國恒執牛耳何得云執者無常

十九年傳冬叔青如京師敬王崩故也杜世族譜云

敬王四十二年崩敬王子元王十年春秋之傳終矣

規云杜與史記不同

並同上